

關愛的故事



好學不倦結網緣

啲人問我，阿超伯，你都 90 幾歲，做乜仲學啲後生仔上網寫 blog（網誌）咁嘅神吖！

自從我老婆喺廿年前過身之後，我就一個人生活。我有 7 個仔，部分已移居加拿大。過去十幾廿年，一家人每年只係見面 7、8 次。直至前年，我見個仔整咗個網誌，睇落幾好玩，咪叫佢教我整囉。然後，我又教個細仔都整番個。就係咁，我地成家人咪係咁「blog 來 blog 去」囉！

初時，我每晚都寫 3 個鐘頭網誌，有時子女唔見我上網，就會急急打電話嚟問我有乜事，所以我幾唔得閒，都要去佢地個 blog 度寫啲嘢，費事佢地擔心啦。我地無所不談，我仲會同網友合作寫連載小說嘅嘢。

幾年前，我開始喺社會服務機構度學電腦，然後學砌機，又買電腦書自行鑽研軟件。我成日鼓勵其他長者學電腦㗎，佢地話唔敢碰子女或者孫仔部電腦，咁，點解唔買番部俾自己啫？幾十歲人，食得幾多吖，點解唔買啲自己鐘意嘅嘢玩吓嗎！？

我除咗上網，每逢星期一至五，都會去唔同嘅社區中心，教授長者活力鼓，我仲開班教授攝影近廿年，仲不時參與義工服務。

子女快樂，自己就快樂；想子女好，自己就要保持身體健康，如果唔係，要佢地日日為你擔憂，你話點會發達吖！所以我話老人家都要積極參與社會，開開心心咁做人，你話係唔係？

(489 字)